

CUSSEGL GROND

Sessiun d'october 2022

Incumbensa da la fracziun da la PPS concernent la pensiun per anteriuras commembras ed anteriurs commembers da la Regenza (emprim sutsegnader Stocker)

Ina commembra u in commember da la Regenza che sorta voluntarmain u sfurzadain da quest gremi, ha il dretg d'ina pensiun per vita duranta tenor la Lescha vertenta davart ils salaris e davart la prevenziun professiunala da las commembras e dals commembers da la Regenza (LSPR; DG 170.380).

En il cas ideal han ed avevan las commembras ed ils commembers da la Regenza in'activitad da gudogn fin a lur elecziun. Sch'ellas ed els n'han betg gia cuntanschi la vegliadetgna da pensiun suenter lur demissiun, returnan ellas ed els per regla puspè en lur anteriura professiun u cumenzan cun ina nova activitad professiunala. La pensiun è vegnida introducida, per ch'i na resultian nagins conflicts d'interess, sche las anteriuras commembras ed ils anteriurs commembers da la Regenza surpiglian mandats en cussegls d'administrasiun u en gremis sumegliants suenter ch'ellas u els èn sortids da quest aut uffizi, e per ch'ellas ed els hajan entradas er durant la fasa da la nova orientaziun professiunala. Er la limitaziun vertenta dal temp d'uffizi a trais periodas da legislatura è stada in motiv per introducir ina pensiun.

Per mintga onn d'uffizi survegn ina commembra u in commember da la Regenza mintga onn 3,5 pertschient dal salari ch'è vegnì retratg sco ultim. Cun ina durada d'uffizi da maximalmain 12 onns correspunda quai ad ina indemnizaziun da var 110 000 francs per onn (42 pertschient da 262 000 francs). Bain prevesa la lescha ina reducziun da la prestaziun. Quai però pir, cura che las entradas da gudogn surpassan – ensemen cun la pensiun – il salari che la persuna pertutgada survegniva sco commembra u commember da la Regenza. Tranter ils paucs chantuns che han anc ina pensiun, dispona il chantun Grischun pia d'ina soluziun fitg generusa.

Ch'ina pensiun per commembras e commembers da la Regenza è gia daditg antiquada, na sa mussa betg mo a maun dal fatg che mo pli ils chantuns Vallais, Sviz, Tessin, Turgovia, Appenzell Dadens e Son Gagl enconuschan anc ina tala pensiun. Er perquai che las commembras ed ils commembers da la Regenza chattan fitg svelt ina soluziun professiunala grazia a lur grad d'enconuschientscha e grazia a lur cumpetenzas, daventa ina garanzia finanziaria obsoleta. In temp da carenza che giustifitgass almain ina pensiun temporara, n'è ultra da quai betg giavischada dal legislatur. En vista a quests fatgs po e duai la regulaziun actuala da la pensiun vegnir transferida en ina soluziun moderna.

La Regenza vegn perquai incumbensada da suttametter al Cussegl grond ina midada da lescha cun l'aboliziun da la soluziun da la pensiun per anteriuras commembras ed anteriurs commembers da la Regenza.

Cuira, ils 19 d'october 2022

Stocker, Gort, Adank, Brandenburger, Butzerin, Candrian, Casutt, Cortesi, Della Cà, Dürler, Favre Accola, Grass, Hefti, Hug, Koch, Krättli, Lehner, Menghini-Inauen, Metzger, Morf, Rauch, Roffler, Salis, Sgier, Weber